

# জালূত ও তালূতের কাহিনী এবং দাউদের বীরত্ব

সাগরডুবি থেকে নাজাত পেয়ে মূসা ও হারূণ (আঃ)  
যখন বনু ইস্রাঈলদের নিয়ে শামে এলেন এবং  
শান্তিতে বসবাস করতে থাকলেন, তখন আল্লাহ  
তাদেরকে তাদের পিতৃভূমি ফিলিস্তীনে ফিরে যাবার  
আদেশ দিলেন এবং ফিলিস্তীন দখলকারী  
শক্তিশালী আমালেকাদের সঙ্গে জিহাদের নির্দেশ  
দিলেন। সাথে সাথে এ ওয়াদাও দিলেন যে, জিহাদে  
নামলেই তোমাদের বিজয় দান করা হবে (মায়েদাহ  
৫/২৩)। কিন্তু এই ভীতু ও জিহাদ বিমুখ বিলাসী  
জাতি তাদের নবী মূসাকে পরিষ্কার বলে দিল, اذْهَبْ

٢٥- ( 'তুমি ও  
তোমার রব গিয়ে যুদ্ধ কর গে। আমরা এখানে বসে  
রইলাম' (মায়েদাহ ৫/২৪)। এতবড় বেআদবীর  
পরে মূসা (আঃ) তাদের ব্যাপারে নিরাশ হ'লেন  
এবং কিছু দিনের মধ্যেই দু'ভাই পরপর তিন  
বছরের ব্যবধানে মৃত্যু বরণ করলেন।

জিহাদের আদেশ অমান্য করার শাস্তি স্বরূপ মিসর  
ও শামের মধ্যবর্তী তীহ প্রান্তরে চল্লিশ বছর যাবত  
উন্মুক্ত কারাগারে অতিবাহিত করার পর মূসার শিষ্য  
ও ভাগিনা এবং পরবর্তীতে নবী ইউশা' বিন নূনের  
নেতৃত্বে জিহাদ সংঘটিত হয় এবং আমালেকাদের  
হটিয়ে তারা ফিলিস্তীন দখল করে। কিন্তু কিছুদিনের

মধ্যে তারা পুনরায় বিলাসিতায় গা ভাসিয়ে দেয়  
এবং নানাবিধ অনাচারে লিপ্ত হয়। তখন আল্লাহ  
তাদের উপরে পুনরায় আমালেফাদের চাপিয়ে  
দেন। বনু ইস্রাঈলরা আবার নিগৃহীত হ'তে থাকে।  
এভাবে বহু দিন কেটে যায়। এক সময় শ্যামুয়েল  
(شمویل) নবীর যুগ আসে। লোকেরা বলে আপনি  
আমাদের জন্য একজন সেনাপতি দানের জন্য  
আল্লাহর নিকট দো'আ করুন, যাতে আমরা  
আমাদের পূর্বের ঐতিহ্য ফিরে পাই এবং বর্তমান  
দুর্দশা থেকে মুক্তি পাই। এই ঘটনা আল্লাহ তার  
শেষনবীকে শুনিয়েছেন নিম্নোক্ত ভাষায়-

أَلَمْ تَرَ إِلَى الْمَلَأِ مِنْ بَنِي إِسْرَائِيلَ مِنْ بَعْدِ مُوسَى إِذِ قَالُوا لِنَبِيِّ لَّهُمْ  
ابْعَثْ لَنَا مَلِكًا نُقَاتِلَ فِي سَبِيلِ اللَّهِ قَالَ هَلْ عَسَيْتُمْ إِنْ كُتِبَ عَلَيْكُمُ

الْقِتَالُ إِلَّا تَقَاتِلُوا قَالُوا وَمَا لَنَا إِلَّا نُقَاتِلَ فِي سَبِيلِ اللَّهِ وَقَدْ أُخْرِجْنَا مِنْ  
دِيَارِنَا وَأَبْنَائِنَا فَلَمَّا كُتِبَ عَلَيْهِمُ الْقِتَالُ تَوَلَّوْا إِلَّا قَلِيلًا مِّنْهُمْ وَاللَّهُ عَلِيمٌ  
بِالظَّالِمِينَ- (البقرة 286)

‘তুমি কি মূসার পরে বনু ইস্রাঈলদের একদল  
নেতাকে দেখনি, যখন তারা তাদের নবীকে  
বলেছিল, আমাদের জন্য একজন শাসক প্রেরণ  
করুন, যাতে আমরা (তার নেতৃত্বে) আল্লাহর পথে  
যুদ্ধ করতে পারি। নবী বললেন, তোমাদের প্রতি কি  
এমন ধারণা করা যায় যে, লড়াইয়ের নির্দেশ দিলে  
তোমরা লড়াই করবে? তারা বলল, আমাদের কি  
হয়েছে যে, আমরা আল্লাহর পথে লড়াই করব না?  
অথচ আমরা বিতাড়িত হয়েছি নিজেদের ঘর-বাড়ি  
ও সন্তান-সন্ততি হ’তে! অতঃপর যখন লড়াইয়ের

নির্দেশ হ'ল তখন সামান্য কয়েকজন ছাড়া বাকীরা  
সবাই ফিরে গেল। বস্তুতঃ আল্লাহ যালেমদের  
ভাল করেই জানেন' (বাক্বারাহ ২/২৪৬)। ঘটনাটি  
ছিল নিম্নরূপ:-

وَقَالَ لَهُمْ نَبِيُّهُمْ إِنَّ اللَّهَ قَدْ بَعَثَ لَكُمْ طَالُوتَ مَلِكًا قَالُوا أَنَّى يَكُونُ لَهُ  
الْمُلْكُ عَلَيْنَا وَنَحْنُ أَحَقُّ بِالْمُلْكِ مِنْهُ وَلَمْ يُؤْتَ سَعَةً مِنَ الْمَالِ قَالَ إِنَّ  
اللَّهَ اصْطَفَاهُ عَلَيْكُمْ وَزَادَهُ بَسْطَةً فِي الْعِلْمِ وَالْجِسْمِ وَاللَّهُ يُؤْتِي مُلْكَهُ  
مَنْ يَشَاءُ وَاللَّهُ وَاسِعٌ عَلِيمٌ- وَقَالَ لَهُمْ نَبِيُّهُمْ إِنَّ آيَةَ مُلْكِهِ أَنْ يَأْتِيَكُمُ  
التَّابُوتُ فِيهِ سَكِينَةٌ مِّن رَّبِّكُمْ وَبَقِيَّةٌ مِّمَّا تَرَكَ آلُ مُوسَىٰ وَآلُ هَارُونَ  
-۲۸۹ تَحْمِلُهُ الْمَلَائِكَةُ إِنَّ فِي ذَلِكَ لَآيَةً لِّكُمْ إِن كُنْتُمْ مُّؤْمِنِينَ- (البقرة

২৪৮-(

'তাদের নবী তাদের বললেন, নিশ্চয়ই আল্লাহ  
তালূতকে তোমাদের জন্য শাসক নিযুক্ত করেছেন।

তারা বলল, সেটা কেমন করে হয় যে, তার শাসন  
চলবে আমাদের উপরে। অথচ আমরাই শাসন  
ক্ষমতা পাওয়ার অধিক হকদার। তাছাড়া সে ধন-  
সম্পদের দিক দিয়েও সচ্ছল নয়। জওয়াবে নবী  
বললেন, নিশ্চয়ই আল্লাহ তোমাদের উপরে তাকে  
মনোনীত করেছেন এবং স্বাস্থ্য ও জ্ঞানের দিক দিয়ে  
তাকে প্রাচুর্য দান করেছেন। বস্তুতঃ আল্লাহ  
যাকে ইচ্ছা রাজ্য দান করেন। তিনি হ'লেন প্রাচুর্য  
দানকারী ও সর্বজ্ঞ'। 'নবী তাদেরকে বললেন,  
তালূতের নেতৃত্বের নিদর্শন এই যে, তোমাদের  
কাছে (তোমাদের কাংখিত) সিন্দুকটি আসবে  
তোমাদের প্রভুর পক্ষ হ'তে তোমাদের হৃদয়ের

প্রশান্তি রূপে। আর তাতে থাকবে মূসা, হারুণ ও তাদের পরিবার বর্গের ব্যবহৃত কিছু পরিত্যক্ত সামগ্রী। সিন্দুকটিকে বহন করে আনবে ফেরেশতাগণ। এতেই তোমাদের (শাসকের) জন্য নিশ্চিত নিদর্শন রয়েছে, যদি তোমরা বিশ্বাসী হও' (বাক্বারাহ ২/২৪৭-২৪৮)।

বিষয়টি এই যে, বনু ইস্রাঈলগণের নিকটে একটা সিন্দুক ছিল। যার মধ্যে তাদের নবী মূসা, হারুণ ও তাঁদের পরিবারের ব্যবহৃত কিছু পরিত্যক্ত সামগ্রী ছিল। তারা এটাকে খুবই বরকতময় মনে করত এবং যুদ্ধকালে একে সম্মুখে রাখত। একবার আমালেকাদের সাথে যুদ্ধের সময় বনু ইস্রাঈলগণ

পরাজিত হ'লে আমালেফাদের বাদশাহ জালুত  
উক্ত সিন্দুকটি নিয়ে যায়। এক্ষণে যখন বনু  
ইস্রাঈলগণ পুনরায় জিহাদের সংকল্প করল, তখন  
আল্লাহ তাদেরকে উক্ত সিন্দুক ফিরিয়ে দিতে মনস্থ  
করলেন। অতঃপর এই সিন্দুকটির মাধ্যমে তাদের  
মধ্যেকার নেতৃত্ব নিয়ে ঝগড়ার নিরসন করেন।  
সিন্দুকটি তালুতের বাড়ীতে আগমনের ঘটনা এই  
যে, জালুতের নির্দেশে কাফেররা যেখানেই  
সিন্দুকটি রাখে, সেখানেই দেখা দেয় মহামারী ও  
অন্যান্য বিপদাপদ। এমনভাবে তাদের পাঁচটি শহর  
ধ্বংস হয়ে যায়। অবশেষে অতিষ্ঠ হয়ে তারা একে  
তার প্রকৃত মালিকদের কাছে পাঠিয়ে দেবার

সিদ্ধান্ত নিল এবং গরুর গাড়ীতে উঠিয়ে হাঁকিয়ে  
দিল। তখন ফেরেশতাগণ আল্লাহর নির্দেশমতে  
গরুর গাড়ীটিকে তাড়িয়ে এনে তালূতের ঘরের  
সম্মুখে রেখে দিল। বনু ইস্রাঈলগণ এই দৃশ্য দেখে  
সবাই একবাক্যে তালূতের নেতৃত্বের প্রতি আনুগত্য  
প্রদর্শন করল। অতঃপর তালূত আমালেফাদের  
বিরুদ্ধে যুদ্ধ পরিচালনার প্রস্তুততি শুরু করলেন।  
সকল প্রস্তুততি সম্পন্ন হ'লে তিনি কথিত মতে  
৮০,০০০ হাজার সেনাদল নিয়ে রওয়ানা হন। ইবনু  
কাছীর এই সংখ্যায় সন্দেহ পোষণ করে বলেন,  
ক্ষুদ্রায়তন ফিলিস্তীন ভূমিতে এই বিশাল সেনাদলের  
সংকুলান হওয়াটা অসম্ভব ব্যাপার।[৪] অল্প বয়স্ক

তরুণ দাউদ ছিলেন উক্ত সেনা দলের সদস্য।  
পশ্চিমধ্যে সেনাপতি তালূত তাদের পরীক্ষা করতে  
চাইলেন। সম্মুখেই ছিল এক নদী। মৌসুম ছিল  
প্রচণ্ড গরমের। পিপাসায় ছিল সবাই কাতর। এ  
বিষয়টি কুরআন বর্ণনা করেছে নিম্নরূপ:

فَلَمَّا فَصَلَ طَالُوتُ بِالْجُنُودِ قَالَ إِنَّ اللَّهَ مُبْتَلِيكُمْ بِنَهَرٍ فَمَنْ شَرِبَ مِنْهُ  
فَلَيْسَ مِنِّي وَمَنْ لَمْ يَطْعَمْهُ فَإِنَّهُ مِنِّي إِلَّا مَنِ اغْتَرَفَ غُرْفَةً بِيَدِهِ  
فَشَرِبُوا مِنْهُ إِلَّا قَلِيلًا مِّنْهُمْ فَلَمَّا جَاوَزَهُ هُوَ وَالَّذِينَ آمَنُوا مَعَهُ قَالُوا لَا  
طَاقَةَ لَنَا الْيَوْمَ بِجَالُوتَ وَجُنُودِهِ قَالَ الَّذِينَ يَظُنُّونَ أَنَّهُمْ مُلَاقُوا اللَّهَ: كَمْ  
مِّنْ فِتْنَةٍ قَلِيلَةٍ غَلَبَتْ فِئَةٌ كَثِيرَةً بِإِذْنِ اللَّهِ وَاللَّهُ مَعَ الصَّابِرِينَ- (البقرة

২৪৯-(

‘অতঃপর তালূত যখন সৈন্যদল নিয়ে বের হ’ল,  
তখন সে বলল, নিশ্চয়ই আল্লাহ তোমাদেরকে

পরীক্ষা করবেন একটি নদীর মাধ্যমে। যে ব্যক্তি সেই নদী হ'তে পান করবে, সে ব্যক্তি আমার দলভুক্ত নয়। আর যে ব্যক্তি স্বাদ গ্রহণ করবে না, সেই-ই আমার দলভুক্ত হবে। তবে হাতের এক অাঁজলা মাত্র। অতঃপর সবাই সে পানি থেকে পান করল, সামান্য কয়েকজন ব্যতীত। পরে তালূত যখন নদী পার হ'ল এবং তার সঙ্গে ছিল মাত্র কয়েকজন ঈমানদার ব্যক্তি (তখন অধিক পানি পানকারী সংখ্যাগরিষ্ঠ) লোকেরা বলতে লাগল, আজকের দিনে জালূত ও তার সেনাবাহিনীর সাথে যুদ্ধ করার শক্তি আমাদের নেই। (পক্ষান্তরে) যাদের বিশ্বাস ছিল যে, আল্লাহর

সম্মুখে তাদের একদিন উপস্থিত হ'তেই হবে, তারা  
বলল, কত ছোট ছোট দল বিজয়ী হয়েছে বড় বড়  
দলের বিরুদ্ধে আল্লাহর হুকুমে। নিশ্চয়ই  
ধৈর্যশীলদের সাথে আল্লাহ থাকেন' (বাক্বারাহ  
২/২৪৯)।

বস্তুতঃ নদী পার হওয়া এই স্বল্প সংখ্যক  
ঈমানদারগণের সংখ্যা ছিল মাত্র ৩১৩ জন, যা  
শেষনবীর সাথে কাফেরদের বদর যুদ্ধকালে যুদ্ধরত  
ছাহাবীগণের সংখ্যার সাথে মিলে যায়। পানি  
পানকারী হযারো সৈনিক নদী পারে আলসে  
ঘুমিয়ে পড়ল। অথচ পানি পান করা থেকে বিরত  
থাকা স্বল্প সংখ্যক ঈমানদার সাথী নিয়েই তালূত

চললেন সেকালের সেরা সেনাপতি ও শৌর্য-বীর্যের  
প্রতীক আমালেফাদের বাদশাহ জালূতের বিরুদ্ধে।  
বস্তুতবাদীগণের হিসাব মতে এটা ছিল নিতান্তই  
আত্মহননের শামিল। এই দলেই ছিলেন দাউদ।

আল্লাহ বলেন,

وَلَمَّا بَرَزُوا لِجَالُوتَ وَجُنُودِهِ قَالُوا رَبَّنَا أَفْرِغْ عَلَيْنَا صَبْرًا وَثَبِّتْ

۲۫۵ۦ- (أَقْدَامَنَا وَانصُرْنَا عَلَى الْقَوْمِ الْكَافِرِينَ) - (البقرة)

‘আর যখন তারা জালূত ও তার সেনাবাহিনীর

সম্মুখীন হ’ল, তখন তারা বলল, হে আমাদের

পালনকর্তা! আমাদের ধৈর্য দান কর ও

আমাদেরকে দৃঢ়পদ রাখ এবং আমাদেরকে তুমি

কাফির সম্প্রদায়ের বিরুদ্ধে সাহায্য কর' (বাক্বারাহ  
২/২৫০)।

জালূত বিরাট সাজ-সজ্জা করে হাতীতে সওয়ার  
হয়ে সামনে এসে আশ্ফালন করতে লাগল এবং সে  
যুগের যুদ্ধরীতি অনুযায়ী প্রতিপক্ষের সেরা  
যোদ্ধাকে আহ্বান করতে থাকল। অল্পবয়স্ক বালক  
দাউদ নিজেকে সেনাপতি তালূতের সামনে পেশ  
করলেন। তালূত তাকে পাঠাতে রাষী হ'লেন না।  
কিন্তু দাউদ নাছোড় বান্দা। অবশেষে তালূত তাকে  
নিজের তরবারি দিয়ে উৎসাহিত করলেন এবং  
আল্লাহর নামে জালূতের মোকাবিলায় প্রেরণ  
করলেন। বর্ণিত আছে যে, তিনি এ ঘোষণা আগেই

দিয়েছিলেন যে, যে ব্যক্তি জালুতকে বধ করে  
ফিলিস্তীন পুনরুদ্ধার করতে পারবে, তাকে রাজ্য  
পরিচালনায় শরীক করা হবে। অস্ত্রে-শস্ত্রে সজ্জিত  
জালুতকে মারা খুবই কঠিন ছিল। কেননা তার সারা  
দেহ ছিল লৌহ বর্মে আচ্ছাদিত। তাই তরবারি বা  
বল্লম দিয়ে তাকে মারা অসম্ভব ছিল। আল্লাহর  
ইচ্ছায় দাউদ ছিলেন পাথর ছোঁড়ায় উস্তাদ।  
সমবয়সীদের সাথে তিনি মাঠে গিয়ে নিশানা বরাবর  
পাথর মারায় দক্ষতা অর্জন করেছিলেন। দাউদ  
পকেট থেকে পাথর খন্ড বের করে হাতীর পিঠে  
বসা জালুতের চক্ষু বরাবর নিশানা করে এমন  
জোরে মারলেন যে, তাতেই জালুতের চোখশুষ্ক

মাথা ফেটে মগয বেরিয়ে চলে গেল। এভাবে জালূত  
মাটিতে লুটিয়ে পড়লে তার সৈন্যরা পালিয়ে গেল।  
যুদ্ধে তালূত বিজয় লাভ করলেন। যেমন আল্লাহ  
বলেন,

فَهَزَمُوهُمْ بِإِذْنِ اللَّهِ وَقَتَلَ دَاوُودُ جَالُوتَ وَآتَاهُ اللَّهُ الْمُلْكَ وَالْحِكْمَةَ  
وَعَلَّمَهُ مِمَّا يَشَاءُ وَلَوْلَا دَفْعُ اللَّهِ النَّاسَ بَعْضَهُمْ بِبَعْضٍ لَفَسَدَتِ  
- (٢٥١ الأَرْضُ وَلَكِنَّ اللَّهَ ذُو فَضْلٍ عَلَى الْعَالَمِينَ)- (البقرة)

‘অতঃপর তারা আল্লাহর হুকুমে তাদেরকে  
পরাজিত করল এবং দাউদ জালূতকে হত্যা করল।  
আর আল্লাহ দাউদকে দান করলেন রাজ্য ও  
দূরদর্শিতা এবং তাকে শিক্ষা দান করলেন, যা তিনি  
চাইলেন। বস্তুতঃ আল্লাহ যদি এভাবে

একজনকে অপরজনের দ্বারা প্রতিহত না করতেন,  
তাহ'লে পৃথিবী ধ্বংস হয়ে যেত। কিন্তু আল্লাহ  
বিশ্ববাসীর প্রতি একান্তই দয়াশীল' (বাক্বারাহ  
২/২৫১)।

[4]. ইবনু কাছীর, আল-বিদায়াহ ওয়ান নিহায়াহ ২/৮; আমরা  
মনে করি স্থান সংকুলান বড় কথা নয়। যুদ্ধটাই বড় কথা। কেননা  
আমরা দেখেছি যে, পরবর্তীতে এর পাশেই আজনাদাইন ও  
ইয়ারমূক যুদ্ধে ২,৪০,০০০ রোমক সৈন্যের মুকাবিলায়  
মুসলমানরা ৪০,০০০ সৈন্য নিয়ে যুদ্ধ করেছে ও বিজয়ী হয়েছে  
(ঐ, ৭/৭)।